

四庫全書

集部

欽定四庫全書

集部

方舟集卷一至四

詳校官庶吉士臣龍廷祝

主事臣呂雲棟覆勘

謄錄監生臣陳 遂

謄錄監生臣曾 照

欽定四庫全書

集部四

提要

方舟集二十四卷

別集類三 宋

臣等謹案方舟集二十四卷宋李石撰石有  
方舟易學已著錄宋史不為石立傳其集亦  
不見於藝文志惟書錄解題載方舟集五十  
卷後集二十卷自明已來絕無傳本今從永  
樂大典採掇編次猶可得十之六七考鄧椿

畫繼稱其出主石室

案此指由太學博士  
點為成都學官時就

學者如雲閩越之士萬里而來刻石題諸生  
名幾千人蜀學之盛古今鮮儷李心傳建炎  
以來朝野雜記稱石在太學時適右學生芝  
草學官稱賀石獨以為兵兆由是坐斥趙雄  
其鄉人驟貴石不與通書及石罷官值雄秉  
政遂不復起是石亦學問氣節之士資川志  
又稱其好學能屬文少從蘇符尚書游而集

中亦有為蘇嶠所作蘇文忠集御序跋知其  
文字淵源出於蘇氏故其文以閎肆見長雖  
間失之險僻而大致自為古雅諸體詩縱橫  
跌宕亦與眉山門徑為近也謹以類排比編  
為詩五卷詞一卷文十一卷又浙江採進遺  
書中有石所撰易十例畧互體例象統左氏  
卦例詩如例左氏君子例聖語例詩補遺諸  
篇皆題門人劉伯龍編而帙首一行乃標曰

方舟先生集勘驗永樂大典所錄經說諸篇  
與浙江本無異而其前冠以方舟集字亦與  
浙江本同蓋本附入集中後全集散亡僅存  
此經說今仍別為六卷附之於後以還其舊  
焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

方舟集卷一

宋 李石 撰

賦

梔子賦

若夫梔子花者薝蔔花也天之生物物各有時時各有  
職職主一時時主一色威福之柄如君如臣如主如客  
不可奈也榴花妥簷與鶴頂鬪鮮芙蓉濯水與蜀錦爭  
魄此非天運之叙乎祝融用威朱鳥奮翼火輪曳空炎

炎赫赫異哉詫乎一花纖微東皇刻一氣浩大天皇織  
而乃與較瑞花虛名為六出乎紛紛披披霧霰爭馳凜  
凜栗栗圭璧盈尺與陽俱升終歲取食可以實百果可  
以瑞麩麥皎皎乎浩浩乎攘汾陰之瓊仙傾壽陽之粉  
額謬老李之鬚鬢奪蟾桂之標格六氣旋軫六月一息  
六而六之變化義畫凡物待之曰此天數也物各有得  
汝自怙權與天爭力上帝照臨汝不無責言畢夢一道  
士曰某即風霆之精雲雨之澤也炎黃苗裔皆吾子孫

爰自典謨既遠有熊是宅漲風雷之浩渺攀星虹於條  
忽巫咸之九神姬旦之土圭所不能測曰戊曰己吾之  
降聖也繼南離以述志植九土而立極西皞之殺物然  
洪波之滔天然吾之役使任為妃匹也佐禹治水我即  
黃魔翊漢帝儲我即黃公傳授兵略幃幄帝師赤松羽  
化者蒼蠶之為梔子乎梔子之為蒼蠶乎歲晚後凋屈  
意膠陰有不改柯易葉者猶足以侶青青而嬾松栢也

四君子湯賦

藥固多變味因以殊一出聖人之制四名君子之徒執德而居豈但反隅之舉分方而治足供調鼎之須原夫神農既已著經黃帝因而治已七十毒也我固知味四百病也誰適可使力調造化謂君者為羣善之君心在扶持如子者乃通稱之子肩股具體齒齡可期喬松下兮負仙人之質百草魁兮荷國老之姿權衡自有輕重臭味何敢差池左右前後小人屬饜於此元亨利貞天下咸樂從之且以子桑裹飯兮以不貧為憂顏回飲

瓢兮以獨樂為喜酥酪鴈行兮蒙起死之懿膏梁穉子  
兮有更生之美將軍拔劍自割肉以就烹宰相隔牆悟  
飲醇於妙理大抵氣之運也或濕或燥人所感也有炎  
有涼得不按之以脉醫之以方伏羲致无妄之喜宣尼  
有未達之嘗最調和之得所縱瞑眩以何傷此治人之  
强弱况醫國之存亡遂令筋下安危因吐哺而歸漢鼎  
中强弱用滋味以干湯且以六官兮有國醫六職兮為  
尚藥由中及外為益不少自邇至遠其利甚博方劑之

書若繁而簡經濟之用蓋詳而約呶咀之誠既至刀圭之仙可作化人之國繼周滿之遨遊聖壽無疆邁武王之安樂迹夫造化小兒固有百種膏肓童子豈無一薰常不死者此固有道羨久生者盍尊所聞以標本而為主以佐使之從君五福壽為先茲為皇極十全次為上永馭人羣異哉已然者治於未然有備者愈於無備藏室之抱一聖門之絕四大哉四君子湯乎此吾醫國之本意

五言古詩

九里松

荷花湖上船松影沙外渡松行又九里涼蘚引深步石  
橋枕溪斜中有入山路意行忘屈曲拄杖扣層戶入門  
已欣然但恐所見阻更須上高樓霽影蒙薄霧急風層  
巔起霧破山缺處青林一點明炯炯白鳥度獨坐不須  
禪山水得妙悟

山圖

丹砂山中期交梨海上約崎嶇九折坂准擬一丸藥至  
今山仙翁已跨紫霄鶴鶴去當歸來塵世憶如昨天使  
自天降招去遊五岳洞府日月長流水花片落我來似  
天意一官不足縛道氣迄未充何以痊瘴惡雲霞闕靈  
藥霧雨罩仙萼臭稗雜菁英凡草混荃若未免七十毒  
誰敢試口嚼上馬憂國病下者念民瘼安得如昔人一  
舉翔寥落

同鄧使君賞雙頭牡丹

兼金必貴雙珥玉不獨隻嫣然彼叢生佳處亦求匹沙  
寒水成練雪洞山立壁春回小洛陽淑氣自融液主人  
似維摩拈花許入室不礙清淨眼粉黛眩青赤聯香颯  
輕吹並影旭朝日有如猗蘭心相同不相敵偶來飲此  
酒對花情有激試哦常棣章反經道如一

黎墨

少休大夫封應夢上公祿向來巖壑姿高節媿青竹低  
徊文繡地自謂遷進速邇者為客卿翰苑文史足炎炎

雖可鄙炳炳有足錄一朝汙濁流錢券滿吾蜀

黎州歲應副印

錢引墨三

千餘斤

童山要進取萬石壓車軸通侯寵富民都尉

侈搜粟雖蒙須臾榮不蓋平生辱社櫟乃天全不及不才木春秋戒求名吾詩紀山麓

王顯之求名其二子曰忠厚曰忠恕

有子固可賀無子誰為羞堯聖傳世念厲醜似已憂有子與無子人事天為謀王家烏衣巷葉葉追前修乃翁萬卷書一一手校讎厚恕命爾名萬金美田疇種德日

復日蘆葦期深秋字表名所出遠意孔與周陶公責端  
宣晉人警師仇君家膝上郎有如昔徐侯富貴二雛語  
豈有卑微休

西堂前老松狀如偃蓋或云即摩頂松也松產  
茯苓為人竊去松今不存因栽數小松補其處  
書此詩壁上

阿師從何來最是兩肩苦一頭載梵書一頭荷慈母至  
今江上松東西隨仰俯此松豈有情摩頂記佛語松根

金史卷一百一十一  
卷一  
白衣僊日夜瑞光吐

或曰松產茯苓有瑞光見如菩薩像

翩然紫霄上蟄

龍起雷雨我來悟前緣父老指環堵風花即几席經草  
隨步武重栽渺生意合抱階尺土他年十八公此地記  
初祖

### 木芙蓉

榮枯一氣內造化本自公春花與秋蒂孰云有不同試  
看木芙蓉雨露滋芳叢嫣然生百巧秀色傾房櫳婢子  
有不愜偃蹇霜枝紅溪柳疎其西池荷亞其東等作一

物者曾是煩春工開闔寓至理歲事號秋風惟有桃李  
場感歎無言中

人日集麓願視堰

大江折兩股小江分一支秋水七八月老麓喜持願往  
往自誇大未覺海若嗤灌溉雖小惠湮溺已可危父老  
指水跡棲苴掛林枝高田混坑谷漠漠沙風吹城堞不  
數步長堤漫委蛇我非河洛想頗為梁益悲神禹豈不  
到吾蜀幾為池人日有故事敢後壺漿期野叟餽魚兔

鼓舞亦致詞一笑謝父老何由救民饑但得麥早熟  
眼底無瘡痍老守為爾醉燈火江之湄老墓亦放光跳月  
天南垂

小桃

方春花氣蘇誰忍犯霜曉漫山千樹桃縮頸聽春鳥獨  
此開數株此桃也不小晨霞碎林霏絳雪壓枝裊梅魂  
正零落月影夜悄悄陳新接物態俯仰映池沼蓬萊有  
大桃歲月較多少自從偷兒得弱水隔浩渺且與傾綠

尊乍見喜圍繞尚有芥子微須彌寄毫杪

送張道士遊西山至道觀

雪打牕外竹共卧牕間床起來忍饑凍對坐唯爐香寫  
之三尺琴遶屋聲琅琅相從無此好要假西山裝西山  
接飛鴻路入雲水鄉六月餘積雪冬木含春芳羣仙競  
來往御風騎鳳凰我昔曾見之瞳子瞭且光張子長鬢  
師沈瀝入肺腸為取橋下履仍傳枕中方此時覓刀圭  
念我雙鬢蒼

送浩姪成都學官

憶昔官博士所得英俊多  
斥去典蜀學蜀士煩搜羅  
二井轉轆轤猶能挹餘波  
袍子白紛紛有如鏡重磨  
愛汝似二父此地曾經過  
分職有十師聖門嚴四科  
儻非一萬卷難取三百禾  
我有十詠詩考古煩吟哦  
鼓鐘樂高文羽翼崇  
雄軻似聞禮殿栢久矣  
尋斧柯古物天為惜  
蒸薪鬼所呵堂堂公議地  
歲月窮義娥忍此志橫說  
後來敢誰何我集四庫書  
琬琰藏洛河此外有石經  
參酌

正舛訛熟讀懋汝學師友相切磋汝有屋三間竹墅連  
松坡日夜望汝成門戶高嵯峩我貧自有道一竿釣漁  
蓑後生問老子守死山之阿

病中謝三山問訊

我昔擇師友所至多朋儔道義自然合如以膠漆投一  
官既已得勢利尋戈矛向者市道交日親成日讎僅餘  
山林士共結方外游一語不及俗自是無悔尤况乃生  
死事同參無異謀何暇及汝曹惴惴性命憂此間地步

窄椰子包山丘三山妙僧傑道眼寬處求憐我本逐客  
饑凍妻孥羞有如呼雲鶴拍拍青泥溝儻非香火緣詎  
肯相恤收阿璋梅檀林手挽銀河流便欲洗俗輩歡喜  
解我愁阿興兩隨我五湖盟白鷗對師思亡友中書爛  
銀鈎阿鑑殊可人出世依大侯禪學瑄演輩圭峯家法  
優人人蹙龍象一笑風馬牛死鼠豈鳳食徒然嚇鵝鷗  
行藏汝自用吾生去來休

大水寓武信二首

前時布穀鳴早種不入土翻然變陰沴兩旬作淫雨半  
夜水齧堤一決不及禦貧民無燈火下牀已沒股曉登  
樹杪呼出沒見屋簷舟車或幸災桂玉豈易煮天數苟  
有定民患誰適與我窮一席地此憂豈暇汝為汝愁天  
公閉戶不欲語

民無穴居智不如彼狐狸奔流決戶入尚懷囊橐資倉  
卒老樨計共此高樹栖茫茫無舟筏渺渺失陵陂號呼  
性命急千鈞懸一絲引手幸免魚十五為流尸古今民

父母唯有愷悌詩吾詩本不作聊以箴厥堤

齊人畫禮器

齊永明十年刺史劉悛畫殿壁器服如三禮

圖席益模本於石經堂

悛或作悛或云劉悛所畫之壁今亡矣

漆器侈初俗長袖喧都城如何古邃殿天開垂日星奇  
奇與怪怪惝恍不識名我嘗閱此畫肇自齊永明人間  
務備物未易窮丹青憶昨因郊丘盛禮嚴天庭器服各  
異數如此係大成仰瞻萬乘聖遠想三代英蟻蝨容著

足駕鷲參結綰西歸訪江梅釣天夢初醒心焉感此畫眼  
角泣欲零所見恐未夥蜀都問君平

送吳道明推官并問趙莊叔何公禮兄弟

送客涪水上我家珠水湄我適歸未得此別那不思高  
才府從事芙蓉映清池堂堂萬卷書樂此簿領卑公退  
得繞膝戲綵笑脫頤山路宿雨乾籬落黃橘垂歸鞍三  
百里處處吟酒旗趙子與南陽衡門各棲遲下馬恐問  
及說與黃梅期尚念鴻鴈行冷落秋風吹

送黃安國同年

同行先  
上峽

沙水夜仍白江月曉未收  
聯船共一岸撼枕聞開頭  
五湖翻然歸鳧鴈蘆花秋  
低徊弄冰雪笑面會有由  
有如此江波大小同一浮  
纖花不自惜風捲隨輕鷗  
誰能徇殘啄五穀肥幾牛  
我欲知行津上峽詢耜耨

李漕和詩次韻

斯文百官富未易衆目窺  
共此一鳥過誰其補三遺  
粗能述前輩抗說不敢卑  
一朝得印可寵若華袞辭  
神仙

點金手為脫瓦礫姿微吟冰雪鏤落墨星虹垂老成今  
幾人縻以歲月遲未用五字工護此兩鬢絲聖賢無盡  
藏一一生物滋丐公且藏舌尚結他時知

驟雨

荒風吼其前大雷擊其後人言黃昏雨此意無乃驟飄  
飄豈惡聲側耳聽簷溜一睡喜暫涼破牕落星宿明朝  
看東方老火已復晝起行視畦隴微露泣深秀枯溝澁  
不流焦塊濡未透看看歲云秋槁死念誰救濫興桑羊

誅妄使土龍鬪彼巫乃誣爾拜舞雜符呪舉頭亦茫茫  
萬一幸天漏雲行則雨施坎畫自羲后為霖有真源中  
路困坑竇眼前蒼狗姿津潤豈能漱何當捲江海九萬  
廣天覆有禱恐未遲帝閭吾欲叩

王晦叔許惠歛硯作詩迫之

書生總不羈豈是謬進取偶然一舟具初不作出處三  
年客江湖風浪恣掀舞君門九天上一一守菟虎是間  
無先容何忍棄外府萬卷久已破一字未及吐歸來賦

蜀都筆下帶吳語傳聞兩坑石妙處天可補試遣長鬚  
來拜賜君已許

次韻何景山愛山亭

好山在樓頭行人在樓下愛山乃貴名過者豈易假而  
況主與客君漫我亦且九峯紫閣間可玩不可把嵐光  
接雲氣溜溜溢杯筴茲山於吾人儻有一日雅從今兩  
舍地時復枉車馬何必滄洲圖醉語剩揮寫

攜子孫到四明洞節叙有感

辛丑七月二日

四明本山名與洞屹相向取山以名洞足以迎景貺我  
非濟時才香火三遣放再為玉局吏聖恩覃曠蕩有如  
鑑湖乞均逸江海上圓也如乃翁歷歷耗心匠三徑同  
蔣詡五柳比元亮一日培壅力百年基址壯桃李遵舊  
蹊松竹綠疊嶂林花拂朝晴山鳥激清響園人收果實  
夏秋各有餉誰云橐駝種已有糊孫藏翁前攜客來未  
免策拄杖崎嶇到洞門衰病筋力彊洞中亦虛白喜氣  
含萬象俎豆具倉猝一杯復一唱山果與山花足以備

清賞杯盤旨味薄筆墨醉語妄醉中忽擡眼雲巢仍在  
望投杯攬衣起涕淚立惆悵雲巢我師友白玉已黃壤  
相距洞與山風雨燈燭晃有如對牀夜了不隔尋丈他  
日吾子孫丹青二老像草堂洞山間二老忽來往

題三昧泉

世傳悟達國師第三尊者於此泉  
上即棄盂後身人面創是錯仇也事

具山中

乳崖霜雪根金地白蓮藥泉上碧眼師秋月照清泚玉  
篔開明鏡肝膽兩寬鬼若為人面創如以佛手洗遂解

七國仇化為三昧水我來愧塵纓與世無愧喜平生一  
瓢心屬饜豢為已定知蜀山龍雲雨高卧裏微絲出游  
戲僧飯水入齒灌溉丹穴深窈窕滄海底人怨旱火焦  
雷公費鞭笞請師拄杖頭攪山喚龍起

伊川祠呈程詠之

彈我清風絃酌我明月罇栖遲元祐鬼零落伊水魂金  
玉百世師丹青幾代孫冰雪耀荒谷雲霧迷空村斯人  
阮衰世吾道誰與論仙人白石溪夫子青山根

遊黃州東坡

斯文元祐間一代人物好我生嗟已後不及見此老竭  
來東坡上雪堂亞荒草此州三家村大江流浩浩四海  
矜重名六丁護殘藁傷心逐客令失脚空山道昔為魑  
魅憎今作神明禱小橋行吟處風葉付誰掃

何司法惠示樂善新編賦詩為謝

不讀非相篇人心謂如面陰機覬窺影巧攫狙伺便誰  
於牛毛端萬念回一善此間有堂與次第躬履踐自言

不為惡凜凜三語掾世塗多疾人奇藥得瞑眩貽我南  
陽書補作東平傳魯國焉取斯為語宓子賤

三游洞

危磴俯寒水陰崖擘蒼烟上開冰雪窟下垂珠玉淵何  
時雷斧手拓此壺中天自然渾沌竅不受百巧鑄地勝  
集靈氣木石含清堅三子果誰歟流輩孰後先我來叩  
玉扃欲訪雲雨仙呼龍龍未醒日高貪睡眠

送王瞻叔總領

吳山浮海青蜀山粘雪白兩山相西東渺渺萬里隔一  
官誰卑高博士省中客歲月成後先去住作分拆先生  
何時來六經尚遺澤衣鉢肯付我頗任弟子責鬚髯襄  
陽翁龍鳳出窟宅典刑耆舊內卿月耀詞伯歸路入西  
湖官梅已堪摘好將軟紅書博此千頃窄夷吾王郎孫  
江左書竹帛臨風失驚呼看刷九霄翮

題王氏款竹亭

夏蟲不知冰朝菌不見月吹息天地間隨分了寒熱誰

金匱要略卷一  
卷一  
為歎歲晚久久婉清節君家小令君千金儼別業不殊  
山陰宅孫子今幾葉勝取三百廛共坐六十劫春林扇  
溫風夏簟落蒼雪重來得更僕千偈不須說

湖嶼

有序

東湖門西偏得小室前揖城堞花木陰茂如  
突出中址也曰湖嶼

我昔泛洞庭白波大如屋水天兩相際渺渺浸坤軸小  
舟掀簸中嘔眩篷底伏忽然得島嶼便欲縋船宿西歸

收驚魂且濯泥土足東湖一席地江脉自滄蓄烟雨相  
吐吞几席染湖淥汀洲紅白花游泳雜鳧鷖橫流溢四  
海未暇較吳蜀駭我時世情風波戒平陸

海山堂

有序

湖嶼之右有堂前有池四時水不竭環以  
數小山竒怪詭異之觀隱見於疎竹幽花之  
間曰海山

海水際天水海山蔚空青萬里供遠目隨處來戶庭庭

中森紫翠戶內含虛明澄波汲引入螺黛疊甃成空光  
集雲氣岑碧延日星逍遙等一物大小隨所經高霞渺  
三韓衆水涵四溟仙馭來何遲上天跨鯤鯨用意敢自  
隘萬慮凝秋清夙緣有悟契矯首鴻鵠征

蓋公堂

有序

海山堂對峙有堂東向到官之十日有嵩山  
異人見訪置榻延之問治道焉頗如蓋公教  
曹參者僕非其才又恐取名之過聊記所本

以從事曰盖公堂

林靜有集鳥水濶多潛魚未能急期會乃更談清虛吾  
家柱下史不讀城旦書偶挾一語契到官十日初僊人  
冰雪容訪我雲霞居掃地蔭修竹引水澆芙蓉吏最累  
不足丞負良有餘深文到穴鼠百巧呈山狙從今結繩  
內只可禁網踈雖非膠西室有此指南車

仙巢

有序

盖公堂上有小樓以三仙山所在也天下二

十四化而彭擅有其三曰仙巢

仙人九天上驂鸞  
紕飛虬飄飄紫霄御  
下作人間遊  
二十四洞天海上橫  
十洲乾門鑿并絡  
丹梯雲氣浮  
中有三仙山  
璫珮鳴琳瑯  
羣仙各分化  
一笑芳菲留我作  
招仙詩  
披風上巢樓  
仙鳥銜玉書  
仙花拂人頭  
手挽北斗柄  
揖取銀河流  
六合正泥滓  
一洗蒼生憂

魚相忘亭

有序

東湖有亭臨水魚游藻荇清冷中公退倚欄

對之甚適扁曰魚相忘

通塗合西南達人戒同異二魚各自魚是魚豈有二濶  
處海茫茫波濤適相戲笑我湖上亭鱗鬣紛族類情知  
我非魚此意魚或是欣然得所適相見不相遇魚行我  
無心我得魚亦遂藻荇披秋光水與天嫵媚明月貼湖  
心照見魚不寐我琴無殺聲蟾蜍勿余忌

九日遊天竺

霞影塔背紅嵐光佛頭綠沙明珠柳外尋路遶湖曲遠

客誰與俱斯遊未為獨佳處心自領未易語童僕應接  
敢憚煩山水相追逐此間有魚鳥怪我來不速都城無  
閒官旬謁廢休沐幸茲九日臨及此秋氣淑醺酣豈無  
分登眺寧免俗起行九里松試插一枝菊西風莫欺客  
破帽雙鬢禿未敢醉向人藕泉漱新馥

秋曉

床頭牕眼白秋曙溜以光暗蛩亦念曉唧唧話夜長披  
衣看天東誰與搴扶桑急風吹雲翳高樹搖青蒼踈疎

沍寒藥散作菊雨涼此景豈虛屬老火候已藏一室清  
淨綠竹陰覆縑細手拊霜雪枝隱几待衆芳

送范至能制置

孔子不到秦右軍念西岷劍關鐵嶺江與世隔紅塵天  
亦惜祕境我豈世間人天上紫微郎筆端演絲綸跨象  
桂林郡騎鯨芙蓉津五嶺與三峽綠雲躡星辰憶公玉  
帳初草木生華春峯龍赤城家長生定前身扁舟載西  
子五湖浮海濱莫作去來想雪山輕重均况從尺一招

甘泉問鬼神廟謨著龜舊鼎味桃李新虞衡備編載

至能

作虞衡志

我亦願卜鄰

送楊德源

葛楠合翠蓋上有菩提坊大江僅一線風動雲氣祥地  
靈生俊傑醞釀成文章墨池子雲家在蜀無他楊君家  
好兄弟接武遊名場我昔夢見之青衫水仙郎修廉貫  
白日孝義感雨暘官滿喜可賀綵衣得升堂遲君臺閣  
歸侍立香案傍寄書問衰疾老矣慰蒼浪

謝馮濟遠惠端硯

學道本屢空所積豈為貧  
我生無長物有輒恐累身挾  
塊公子伯陶土帝者仁可惜  
冰玉姿下與瓦礫親吾子  
泮林舊文采含青春江湖挹  
餘波謂此席上珍方正自  
溫潤玉德如其人潦倒竟何  
用厚德山岳均愧非筆札  
才不堪演絲綸三召已三逐  
琬琰甘猥塵投拭置前列  
濯以天漢津斯文儻未喪六  
經要鋪陳大易伏羲祖春  
秋丘明臣琢磨三益友几案  
增日新定非注蟲魚與世

書鳳麟

蜂蟻

乳蜂十蟻圍小蜂兩翼弱三蟻掣蜂首四蟻曳蜂脚三  
蟻相後前捍圍行且却蜂母正憑怒有螫無敢作相視  
母子心如被蛇豕虐蟻行蜂母隨衆力豈易撥彼嫌大  
樹小且幸神龍涸自謂無誰何利吻得所嚼蠅虎伺其  
便儼然才一躍中道取蜂去意外可遙度蟻羣不自量  
出力互相搏蠅虎跳擲高細碎紛迸落餘黨尚未解尺

寸歸路邈三師本伐戴反為鄭所掠孟明意取鄭二殺  
遭晉薄世路蜂蟻羣熾險逞攘攫向來騶虞仁未似蟻  
虎惡吾詩儻可佩捧腹聊一噓

次蒲尉韻

斯言誠虛筌遮眼漫盈紙冷暖當自知此味如飲水誰  
肯落驕榮還來共枯悴待渠轉船頭著力與風值最憐  
氣炎炎可上不可下青天與白日信有覆杯夜空林鳥  
雀喧村巷牛羊窄童子候簷楹喜此扣門客客來踏青

苔曳杖入林薄只許老梅官謂我門無雜我貧無娛客  
相視笑不止向來諸阮間容我亦與此陶然見天真客  
亦憐我醉罷休明復來酒賤肯勤置

贈楊教授

讀書要身榮得祿為親喜端知絳帳華乃在綵衣裏冷  
官多澹泊有道足甘旨登堂四壁餘發帙照案几尚有  
老孟光環以三穉子一笑扶鶴髮相見折屐齒出門顧  
諸生正事歌錫爾生朝適餘暇湯餅慶弧矢衆客集清

辰好語塞兩耳我有海上方剩泛盃中蟻永為萱堂壽  
勝飲菊潭水

送陸務觀

近別已不易遠別良更難莫作遠近想便覺宇宙寬聚  
散與出處等以道眼看君去便鄉國我留為親懽吳蜀  
視旅亭隨處寓以安誰能詫凡見鷄駟齊鵬搏是家好  
門地羽儀耀朝端竹西丞相客冀北幕府官清廟瑚璉  
器仙人承露盤談笑翰墨香芳佩雜萑蘭雪山笏拄頤

碧玉高巘岼鋒車促收召買舟繫江干瞿塘浪粘天怒  
濤駕風湍西湖軟紅路塔級層旃檀還來捧御床剖腹  
呈琅玕前修席玉鉉舊事追金鑿潦倒困災患名節空  
彫殘不假子夏蓋敢彈貢禹冠隔濶如昨夢道義期歲  
寒日邊一紙書時煩問加餐

楊德彛立春日攜詩遠訪次韻

鞭笞土牛子鼓舞勾芒神初開一歲籥已有五日陳胡  
為松桂老強逐桃李新自言草玄客頗愛鄭子真雖云

公卿貴虛名竟成塵况我已三黜素志無一伸遂去田  
舍畔得與漁樵親奉母缺祿食菜飽不敢嗔夫君亦人  
子等是我輩人青鞋裹白足烏帽遮長身襟期訪鄭老  
酒伴尋南隣吾文天未極古道日以堙登壇要先軟更  
約明年春

直方大

有序

廳事之右有明牕北向冬溫暑涼公退求所  
箴規之地曰直方大

梧桐角可磨江沙玉能錯由來剛強徒未易勝軟弱是  
在六二坤對病可為藥吾生任天真三者不自度中年  
坐齟齬出語遭擊搏官居寄委蛇晴牕傍林壑泉乳發  
深竇竹萌抱新籜不習其在茲玩爰情所託一字得一  
師聖賢如可作坐待韋編翁為我解禪縛

漢孝景時太守文翁始作石室西為文翁稍南  
為高朕比文翁石室差大皆有石像蜀守席旦  
奏秩文翁高朕于祀典竊疑二室者蜀人所以

祀二公之意非必自作

來為人所愛去為人所思君看文與高慈惠蜀之師至  
今窟中像凜凜建立時知非伯有室定是桐鄉祠蜀人  
愛二公遠與千載期其間幾灰劫付與一炬吹保此歲  
崢嶸不動山四維東家好鄰里豈任惡少窺祠前二古  
柏外乾中不萎勿作剪伐想恐是神明遺可憐牆壁間  
我冠劍拄頤烈士不平氣好在淮西碑

憂旱

清和氣始交候火未可熾雨師偶失職焰焰使人畏東  
湖冷如水捨此誰止沸猊吻呀不吐濁泥點枯翠農田  
不難料焦灼凜生意西南有重屯百萬方振臂自今數  
秋成一飽儻可冀蛟龍卧慵懶朱鳥誇羽翅吾生老文  
園肺渴不自慰安得挽天河併為洗兵氣

送王郁教授

陰山多風埃白日下雨電君子何必陋士氣見淳樸巴  
江亦能騷蘭陵善為學斯文隨所化後輩仰先覺褐衣

懷美質隱隱含山璞先生來何遲  
絢秀待追琢板輿行不難  
雙鴈度雲邈未嫌一簞蔬  
頗勝五鼎渥教人此其本  
何異塾巾角我昔困齏鹽  
為子得妙斲王明躬孝治  
正要夔典樂小試臺閣資  
還來侍經幄

次牟朝佐見贈韻

郡齋冷秋菰飯客比僧供  
如何齏鹽厨便謂酒肉夢  
此間百戰場肥瘠較輕重  
霜花氣未暖冰漸硯含凍  
牕梅眩書燈厭聽曉角弄  
鄉心競節物椒盤已可頌  
一堂元

祐師翠竹忍留鳳取材有成約浮海誰與從翻然著鞭  
先逸足未易鞚他日仇池書為記小有洞

朝佐為石編  
類拙稿十卷

甚有力故卒章及之  
小有洞郡圃新築

### 芝草

邊上秋風生衆芳感蕭瑟何由九地底一氣回暖脉官  
居類僧坊忽有芝草坼駢跗間紅紫合蓋暈黃白秋菌  
苦爭氣渠自凡眼窄此理豈人為信我匪天厄年餘竊  
邊廩菜飽固不擇謬政鬼所笑敢望神意格山中合歡

桃隴上六歧麥一年獲三瑞

曲水亭芝草分附合蓋  
桃麥皆今歲所得之瑞

助

我動行色歸來及受釐藉口緩誅責從今歸商山舉手

謝樵客

次范宰韻

三仙白雲鄉地與人境異金巵老翁泉玉盤秋水芟誰  
歟肯下食三仙入夢寐一笑謂我言隨處類投畀藿願  
霜雪山危步踏森翠山間多君子一飯豈易致詩書寬  
褐安曾何問名位家傳元祐學口語自嫵媚頗識李夫

子一官若無意善惡政亦殊天心各緣類大哉聖人經  
春秋不書瑞但得好麥禾風雨煩筆記屢書不一書金  
玉文彩被物物胡為來根莠異形氣便欲獻天子明時  
乞宣示斯文儻有作士子歌既醉我亦採民言請付圖  
牒吏

嚴一飛惠余一唯圖書贊其上甚佳石更名忠  
恕圖置之座右以為居官奉母之規再用眩字

韻

善水沃沸焦善藥調瞑眩吾豈斯人徒屏開慈母面丹  
青解人意二字出素練孝哉耘瓜子傷根豈所願升堂  
致一唯出門成兩見遂令李老書不入韓非傳吾家桃  
李園力行未敢倦明知政事拙稍覺言語賤四科定誰  
先袖手冰入硯會請無言師寬處著方便

覓德醇菊花

春秋書不雨十日九日乾向來陳菊根半掃黃葉殘施  
施蒼松獨耿耿秋竹單仙官轉物手半畝不作難艾籬

扶弱幹團翠蒙朱欄一株萬寶釘風露鳴珊珊兒輩凡  
眼窄詫作舉首看折君清霜枝照我秋水寒年饑學辟  
穀准擬充朝餐

九日同胡子遠攜三子以重陽能插菊花無分

韻

去年萬里客仰看秋雲孤今年返南畝頗復懷西湖今  
日果何日淑氣天四隅憑高送遠目風景未覺殊試問  
先生菊何如朝士萸莫作去來想渺渺同一區久客負

隣里置酒煩招呼起登舍畔山山色定有無澹烟與晴  
日醉眼相糝糊我老腰脚頑健倒須兒扶

題黃筌牡丹花下貓

紅英艷雲霞綠葉足風雨牡丹花未開生意妙誰主丹  
青強摸索閉目想未睹天巧非人工神凝志良苦竦然  
花下貓蜂喧聒如鼓醉眼不成睡花氣日亭午黃生與  
我意盤礴一轉語我老花無情鉛粉付兒女

次韻宇文守攜酒相訪

宇文守  
名紹英

天雷裂山崖驟雨翻盆盎田畝懷政最草木知治狀使  
君富經術暫屈乘一障黃堂燕清香比屋醉春釀文章  
出指授學校均幼壯獨我困樊籠老矣神不王尋醫詩  
未免勉力追絕唱滔滔原夫輩感此舍人樣旌旗出幽  
扉俎豆忽迂訪小摘情益親村春未忍相蜀叟初不識  
漢墨拜竒貺從今門張羅一任臺無餉

欽定四庫全書

方舟集卷二

宋 李石 撰

七言古詩

次張益州芝草十二韻

紹興己卯武成廟廟殿之棟三秀芝學官奔走暨多士  
日遶百匝不暫離欲奏九重望恩幸寒餓水火如切肌  
先期到堂白宰相宰相曰可甚易為樂工伶倫飾金玉  
擬薦清廟裁歌詩石時官忝博士職豈敢立論超等夷

曰此五行金沴木木不曲直嘗聞之將軍鷹揚兆異氣  
弄兵往往憂潢池矧今裕民民未裕聖慮日軫天下饑  
斯言一出自拭目再召再逐彌歲時山東山西將與相  
一天雨露均無私喜聞謀帥用鄉士乖崖以來無此奇  
目之所覩世有異口不敢言人更知頃年喋血岷峨下  
啟此厲階端自誰種芋從今我田喜漚麻却得吾水滋  
中和薰蒸感瑞物雪山增重陰雲披昔人佳政喜傳授  
便謂子產勝子皮江南諸子識我語帳下未忍驕羣兒商

山一曲似可作出處恐笑山翁癡不如去學赤松子掉  
舌三寸為帝師

山舫

母廷老作船齋窓間兩小湖山甚佳因以山  
舫名之

君家屋中作山舫開牕看山蓬背上兩峯高並玉玲瓏  
大孤小孤無此樣主人釀酒書滿船讀書飲酒酣且眠  
應笑周郎赤壁下龍驤萬斛風動天

馮震野航

蓬萊弱水三萬里片帆風便一日耳世間衆水集枯溝  
鼉鼉自誇河伯秋况於平地鑿戶牖此豈有水仍推舟  
先生彈鋏太不惡昔人野航今改作明知此意不為魚  
船頭船尾千卷書筇筓活計大如斗欲駕雷電凌空虛  
白波漲天須少待小劫未遲蒼鬢改安排去作踏浪兒  
幾度桑田變成海

送僧南遊

天下香火如東林雷劉勝迹猶可尋阿師跳出矮屋下  
萬里抱被雲水深汝家老演舊行處江梅樹樹前時吟  
可憐此老今已矣門戶久冷懷語音去年送圭今送汝  
演子兩虎不易擒吾詩最慳亦何用且為向來衣鉢重  
逢圭問我強健時猶抱黃經戀齋甕

次韻何思召求中江縣學額

九州多士各有貢大小之物隨土宜養材學校此其本  
背本逐末寧不悲偏將土木奉釋老盡室奔走愚無知

君子居鄉有宓賤小人願學如樊遲聖門二者今戰勝  
文星不用天盤推一朝化出孔子廟唾手如有神明司  
文翁以來節度府羽翼此邑天西維春秋俎豆列二祀  
晝夜几硯嚴十師荀卿許從異戶入子貢只得肩牆窺  
我生一官五講席所至凍雀栖寒枝自從上庠吏外學  
行德自謂心無欺眼看旄頭拂紫髯左文右武今何時  
塗侯居鄉足領袖金橐相與傾其私自聞盛事喜欲舞  
出力敢後吾人期黃庭細書不足道籠鶩尚可尋義之

澹臺斬龍由搏虎書成有似二子為高山仰止不無意  
鵬翼九萬雲天垂

王家亭池

涪川勝處城之西萬松直上王家池池心有亭無四壁  
五月菑苔生淪漪向來城中望山上但見一抹深黛眉  
却從山中望諸處雲霧平野光參差飛鴻羣往山數點  
陣馬萬匹江東馳眼前景物費酬答中有隱几無言師  
題詩他日要人識君家有叔良不癡

次韻唐立夫永川五柳堂堂李齊年所建十年  
間三易名立夫作令為復之

我與李侯初不熟但聞弦歌政聲速永川鷄犬數山外  
迄今語言猶可錄向來官舍卜清疎把酒橫琴僅容足  
眼前可無起予者故作斜川著行錄不妨奄有靖節名  
此堂岌岌柳英英易名伐樹公則去名尚可復柳易生  
唐侯初來理前事收拾神名還舊地坐令軒冕爭奪心  
各有田園蕭散意古人陳迹那復論丈夫志氣高入雲

因知特起豪傑士不待西伯還明君

張紹賢以詩索佩刀次韻復還之

喜不至流怒不悲句中銛鋒解人頤冰霜凜凜笑一呷  
三尺有喙金玉詞二惠肯來但獨步明光殿中文繡具  
便當攜此上青雲天子方深南北慮吾今老矣君可思  
吹毛之珍何所施和詩反刃三歎息莫把神槌困鈍錐

題金馬碧鷄神祠

持節使者來自天玉皇遣問金碧仙蜀山嵯峨九折外

瓊樓絳闕迷風煙  
駢駢蹴踏長楸道  
喔喔下鳴芝草田  
漢家一瑞恐難致  
殺人自要身長年  
麒麟鳳凰不知愛  
僊物未忍隨拘牽  
至今滇昆水含怒  
怒迸海脉浮平川  
資中男子文章伯  
執筆金鑿殿中客  
碧鷄飛去却飛來

此地遂為金馬宅

金馬神祠俗傳以為諫議大夫王子淵也按子淵宣帝時持節祝三神於

益州韋齊休云拓東城兩山對峙東北為金馬西南為碧鷄昆池水出兩山下北折東注而滇池自雋以西與昆合而東注蠻人槩以滇池目之不復云昆河也二水皆出三危蜀江所本一云兩山時出光怪山形如二瑞一云鷄出水中未知孰是子淵移文云持節使王褒敬移南崖金精神馬剝剝碧鷄處南之荒深溪回谷非土

之鄉歸來歸來漢德無疆廣乎唐虞澤配三皇華陽國志云青蛉縣禹同山濮水所出子淵資人墓在資陽年

月日李

石書

謝楊壽卿惠香木拄杖

夜郎溪中七香木長身一握如紫玉向來蠻村已自竒  
恥與龍涎鬪餘馥誓將簪力奉君子度越山巖走窮谷  
夫君得此不自珍要當助我扶衰獨憶昨與君騎竹馬  
健力隨羣走黃犢看看四十老形具此物胡為苦催促  
世間行險豈吾徒且卧方舟同結足

三藏梨

沉黎廳前三藏梨老虎鬚牙龍甲皮我來與國惜喬木  
尚幸出屋繁孫枝春風千花玉葉碎秋日萬子金圓垂  
問禪誰是栢樹子聽訟漫逐棠陰移雪香樓頭終日坐  
紙尾自書三百顆他時若問相公槐我為改名羅漢果

俗多諱梨以梨為三藏刀子  
欲改名為羅漢果以便俗諱

徐童子彈琴極聰慧詩勉其學

鬢如丫角垂兩耳口誦黃庭調綠綺諸公拂榻乃肯留

疑是前時徐孺子我琴掛壁久不彈  
浙聲分作蜀聲看  
但得古人指下趣轉覺良工心事難  
欣然過我同一笑  
舊曲重聞如再少  
咸韶本自鳳凰鳴  
箏笛任誇蚯蚓竅  
孺子孺子年更癡  
十三大勝陶家兒  
阿端不識六與七  
隨分牽衣覓梨栗

贈墨手道人寄晁子止即用子止韻

夷門道人墨為手  
藝如巫咸日中走  
逢人便與墨模糊  
西里自妍東里醜  
不須更相邑中黔  
面比烏鴉色未深

為擡墨手高處問我手何如君子心

挽船

羣兒生長輕江湖上船下船誰使驅江牽百丈沙水澁  
岸上風雪兼泥塗下循枯葦鷺鴨亂上控絕壁猿猱呼  
可憐進寸得退尺挽脚不住頭欲扶均之兩兩窮性命  
我自宥罪非爾辜二年學省一不補天子幸赦憐其愚  
一船放歸小如葉滿載豈有海上珠琴書之外求長物  
去時未有來時無爾曹憐我共努力歸路尚遠天西隅

泊船且醉花柳岸為爾尚肯滿眼沾

喜雨謠

春水搖凍春水肥小風卷沙梅雪飛東皇勸人作耕織  
天雨粒粒機中絲田家喜說新年話苔青映門竹枝亞  
有錢輸官官不嗔滿地黃金不論價

次韻趙彥膚栢梁體送張道錄

焯銅作梁劔棧編峽江百丈青雲綠峽山鳥道飛翩翩  
蜀仙自得壺中天丈人口訣誰與傳青城

青城一名赤城

一炷

心香烟縈藤絡蔓紫翠牽清河鍊師天上仙玉華樓高

瞰平川白日下界黑鬼纏

玉華樓高處見平川人境出沒塵氛也

帝曰汝

往予詳延鼎轉九丹書八篇清風來翔明月前夏日不

暘冬不綿青驪白鶴忘歲年是家仙種張祖先

張開光乘青驪

至資州玉紫山張四郎在邛州白鶴山

椒子紅熟丹浴泉釀成白酒斗十

千先生日日貪醉眠為我寄語來日邊

遊銅梁縣雲巖

我來雲巖夏初吉巖洞向晚開新蟾晴空飄飄雨花坐

護此燕兒垂飛簷老僧閉門一榻外但有瓶鉢雲火匳  
人間日車手可熱道上火織官爭炎不知此地陰冰雪  
崖花石蔓駢濃纖傳聞仙人有蛻骨玉塔未許窺幽潛  
行人各走記名姓浪費粉板相羈黏不知蘇黃巖上字  
端有妙處垂緇纒至今巖泉瀉千仞似與二老爭森巖  
斯游與子固不薄一餉喜遂清賞兼稽首林間古石佛  
面目慈悲雄鬚髯狐狸騎項鼠遶膝蒼苔蘚剥侵裙襜  
我願石佛須少忍欺善怕惡神所殲君不見邇來石佛

勝銅鬼會煮翁仲烹飛廉

余所藏李文才畫鶴甚奇偉歲久縑爛各缺一  
趾偶有善工為補之

高軒得意翔雲間妙畫匿迹縑素殘柱頭老丁留語後  
兀兀無趾如叔山不妨萬里戢六翮顧步下啄芝田寬  
方舟惜鶴並惜畫一夔之足萬金價莫將凡筆補丹青  
謬作身輕一鳥下

郭宰生朝

汾陽家世郎官星百里隱隱聞雷聲德人所至有別樣  
不向尺筮求能名上官嗔罵吏束濕日下廩庾堆如京  
此時桃李出談笑溪邑井井山風清東林香火遠公社  
長官得暇來尋盟雲間春茗試新瀹月裏禪心須細評  
今朝還有壽者相松椿龜鶴紛喧爭高人著意供一點  
富貴浮雲雙眼明

夏旱

四月旱火坤西維湫潭百丈滄江湄潭中老龍帝所御

偃蹇不任世俗羈招呼頻費香火誠去則甚速來何遲  
炎官火織日輪午一塵不動天琉璃火光之中興白霧  
風伯鼓鞀雷奮椎黑雲壓城白晝暝倒瀉銀漢傾天池  
帝勅九鳥以震死血飽龍吻紛淋漓再拜謂龍曷少霽  
龍與我職均有司商霖儻可通帝夢正直炯炯唯龍知

贈開元觀李法師

以射虎得官棄  
官入道年九十

射虎將軍鬚髮白老作三茅洞中客羣仙呼去問姓名  
謂是前時李八百天孫乞與雲錦衣白日化為仙鶴飛

赤城山下百花市賣符賣藥沽酒歸

放魚

三年計日作放生薄俸時分及魚鳥別來湖山幽絕處  
下者遨遊上輕矯西歸短棹送春波忍見長魚困縈繞  
修鱗戢錦紛半破健尾舒紅時一掉不惟咫尺迷藻蘋  
正恐須臾背葱蓼吾曹仁術隨所用圍圍洋洋誰不曉  
恥與雞蟲較得失况乃牛羊分大小只今命脫猛火熬  
不用口銜明月皎臨流祝魚從此去彈指寃親一時了

要將頭角動風雷未厭藏身且深渺

周公禮殿

漢人祀周公為先師故鍾會記云周公禮殿  
范蜀公鎮云屋制甚古非近世所為秦漢以  
來有也內翰王素云其屋制絕異今制後之  
葺者惜其古不敢改作

蜀侯作類錦水湄先聖先師同此室巍然夫子據此座  
殿以周公名自昔聖人兩兩如一家均是周人先後出

想見東家中夜夢猶與公孫同衾烏斯文授受乃關天  
不為漢唐加損益我時來視俎豆事重是漢人斤斧迹  
漢宮制度九天上散落人間此其一多因豐屋起戎心  
獨此數椽綿歲歷規模嶻嶭東魯似氣象縹緲西岷敵  
竹松猶是斯干詩風雨方知隆棟吉雖然漢獻來至今  
閱世已多駒過隙中間豈無烏鼠慮妙斷不知難輒易  
工師不揆亂如麻敢向般門言匠石詩書譬彼尚闕文  
後學如何補遺逸祖龍非意竊登沐蚪蚪有心來壞壁

舊章僅在命如絲誰勒吾詩勝丹漆

禮殿聖賢圖

者舊傳云西晉太康中益州刺史張收畫而東晉王右軍已有書問蜀中事知有漢時講堂在知畫三皇五帝以來人物畫文精妙欲因摹取得廣異聞則疑非收所畫當是自漢以來畫至收輩遞增益其數耳然畫之後前既無可攷則當以收為正嘉祐中王素命摹

寫為七卷總一百五十五人為成都禮殿聖

賢圖蜀守席益又嘗摹其容貌名位可別識

者一百六十八人於石經堂

又按元豐郭吉虛圖畫見聞誌

云漢文翁學堂在益州昔經頽廢高朕復繕葺圖畫古來聖賢之像及瑞物於壁未知孰是則與者舊傳小異

成都名畫窟所至妙宮牆風流五代餘軌躅參隋唐其間禮殿晉畫為鼻祖未數後來鴻鴈行畫者果誰歟或云名收人姓張右軍問蜀守墨帖求縑緙乃知前輩人

不愛時世粧范瓊杜措李懷袞仙荒佛怪驅喝雷電筆  
意窺渺茫不若收所畫上自皮羽之服下至垂衣裳盤  
古衆支派帝霸皇與王君臣分聖賢有如虎豹龍鳳殊  
文章視之若有見日月星象空中垂耿光聽之如有聞  
衝牙玉佩鳴以鏘三古以降歷今世視聽所感猶一堂  
乃知此畫自神品碌碌餘子非所望吾道久已屈二氏  
爭頡頏豈唯牧也見絀餘子下而有公議老我雙鬢蒼

蝦蟇碣

水晶宮中玉蝦蟆多年栖息嫦娥家忍饑不及一夜啗  
明月天帝怒爾謫下三峽脚手猶爬沙婪酣大肚飽清  
氣但見瓊流珠液百尺垂哈呀峽人只作泉水看不知  
元和漱嚙猶是月之華從來至味不可說陸羽只作第  
四誇可憐提瓶肥孿子強飲百斛莫救肝膽邪我聞老  
蟾之酥乃仙藥能使風草化作黃金芽何如閉口自潤  
澤換爾醜質生角牙會當騎爾却上月宮去下看桑海  
渺渺凌蒼霞

題陰山七騎圖

回巖客子賣墨人諸孫賣筆筆有神墨翁已入蓬萊殿  
筆孫有愧中書君邇來小孫兼好畫兩幅溪藤七匹馬  
虎狼避路狐兔藏朔風吹沙霜滿野邛峽關頭大渡河  
使君五馬千丈坡獵將一圍看蠻走醉敲銅鼓蠻踏歌  
急收此畫人莫識矍鑠之翁誇筆墨不如再泛洞庭船  
袖中一劍隨飛仙

問趙有方乞琴

公子年時尚竒偉大劍橫腰髮衝起自言學道晚有得  
心靜無波古潭水平戎萬卷暗不吐蟠向胷中作宮徵  
眼明慣識嶧陽材手製教成古綠綺人生會費幾兩屐  
巧處才容一張紙許多黑瘦肯忍饑枵腹悲鳴聒人耳  
公子公子贈我來明珠白璧遭沉埋我家老馬解仰秣  
渠家煮鶴充枯柴

宇文子友以詩來覓酒

玻璃江深麥初熟引水細舂比炊玉老守齋鉢自有餘

全宋文卷之二  
卷二  
端為吾民憂不足荔枝堂前紅數栽倚樹讀書門不開  
收麥入厨催釀酒客問遣騎何時來

彭州行邑道中

四月少雨百草熱山中小麥皆乾枯溪水不流牛缺飲  
連耒未動妻典襦布穀催耕鳩婦怨早得一雨淋汝面  
老夫枕書卧晚涼農自忍饑官飽飯

贈楊尉送湫水

天上安雨水鳴渠一龍任責固有餘今年水來雨不集

彭民不及江中魚以堰致水高百尺靈湫在淵爍紅日  
彭民怨龍不怨人龍則有職誰之失九峯仙官梅子真  
峽龍有術龍不嗔去年作堰今請湫二者兼得蘇彭民  
東湖別駕但捧腹卧聽蕭蕭響疎竹往來莫便輕泥塗  
軟脚有酒為君沽

東山行

龍池山頭喚龍起見說花開龍亦喜喜將一雨洗山光  
曉漲初分兩谿水東山渡橋煙霞簇山半亭臺艷桃李

入門一徑海棠花紅玉為枝霞作藥仙花自有龍麝氣  
拂拂晴風香十里木蘭高下色不同青紫朱綠黃白紅  
遊人隱映錦繡谷山鳥動搖霜雪叢我來酌泉弄花樹  
花光正在水影中君不見三碭城邊百草熟渡瀘將軍  
不得歇何似兩仙樵斧郎一局坐忘春晝長

爛柯之地  
在黎州

### 資聖看畫

資聖名藍妙畫窟前佛崢嶸連後佛栴檀級上金琅璫  
五月寒風吹佛骨我來看畫瞻仙容丹青古殿開天龍

蒼蘂花開日亭午妙音破睡聞鳴鐘

送叔規

鳳臺却望桑麻川殘僧孤客同一年我窮自取君更苦  
只有布襪青行纏松楠陰陰水邊寺一餉款尋香火緣  
筆端落盡蔬笋氣宵次不留荆棘田窮冬衣褐露黑肘  
半夜風雪寒詩肩時於連牀乞被卧睡到日午鐘魚傳  
今朝別我眉色好得得西謁騎鯨仙自云老矣世塗熟  
獨有此老無人憐更須南去共舟楫竹火江茶譚夜禪

送范穎甫

君之家為夔龍氏龍之威神爪牙利豈肯因人下求食  
拏攫風雷隨所嗜問君世學今幾傳翰墨諸仙侈名位  
後來諸孫穎與路元祐衣冠相整治春秋大易蜀有師  
我獲升堂時問義江邊喬木殊未改重來忍唾成都地  
感君遺文遠相訪凜凜高風今不墜梅花道路寬作程  
瓠葉杯盤同此味少年赤手弄霜雪想見倚門遲歲餽  
還家莫道囊橐空客子夜寒仍少睡

送新趙宰

身作涪江未歸客更送行人出南陌行人磊落高皇孫  
桃李賓城者朱白高才觸事無不爾百里莫嫌民社窄  
魯恭卓茂意何者豈有居官名赫赫不須打鴨驚鴛鴦  
抵几疾書呼五百阿奴公退在眼底可以彈琴把書冊  
此時尚及詩筒來談笑千山萬山隔

贈張聽聲

人言鼻聽無如龍聽不以耳乃反聾未若水母本無目

隔水響應相鳴雄我持此理問張瞽廢目任耳偏能聰  
忍聞此聲亦憤憤俗囂政在羣鳴中枉將蟻動作牛鬪  
妄遣蚊聚成雷公昔人樂歸瞽其職五音六律詩人矇  
我琴三尺玉橫膝欲廣舜孝歌時雍游魚舞獸解人意  
此意憂樂斯民同瞽乎洗耳試一聽莫似北客歌南風

石經堂

偽蜀廣政七年其相母丘喬按雍都以舊本  
九經命平泉令張德釗書而刻諸石是歲實

晉開運甲辰也蜀守胡宗愈作堂以貯石經  
席益增葺為記

我來一登石經堂從以諸生行兩廡諸生讀經半白頭  
問以始終籍不語我聞此經昔中都郎中所隸乃其祖  
邇來離亂已亡失楷本僅能傳蜀土蜀王閔位供掃除  
獨此仍為盛時取為將嚴鐫守重扃護以繚垣崇邃宇  
列之學官豈無意不但闕文存夏五大開明鏡別妍媸  
時扣洪鐘諧律呂後生不復事丹鉛抵死唯知守藤楮

字音隨口妄蛻霓點畫分毫謬魚魯日月當天空委照  
盲俗相欺紛莫覩石經雖古奈爾何人競傳今不傳古  
行行矧肯捩眼覩薛剝苔封費撐拄堅鏡僅免飽蟬魚  
隘道爭來宅狐鼠此間鄒人儻借問為問石經誰是主  
憶昨敲門肆訶斥幾度循牆誇偃僂登登閣閣隱金槌  
耳聒散空垂電雨蠟薰煤染連作卷玉軸錦裝如束杵  
豈無一物媚權豪幾紙才堪博圭組爾之所得固么麼  
我則何由寬擊拊一槌只作一字訛訛至萬千那復數

石經之害此其大縱有鬼神誰可禦憶昔嘗為博士官  
首善堂中容接武心知不是世間書雲漢森然城百堵  
恢恢帝所有餘地忍使石經留外府便當連舸下瞿塘  
飛上三山如插羽縑緗舛謬鐘鼎暗天罅豈容無一補  
巍巍玉帝殿中央河洛東西翼龍虎雖然斯文屬興廢  
帝既有心天亦許作詩未用擬韓公考篆庶幾追石鼓

謝楊壽卿送雙鴨用香木拄杖韻

我家羣雞真似木君家雙鴨重如玉情知此物不敢烹

未忍憂羹求刺馥傳聞深村水田裏翠羽成羣蔽溪谷  
喬仙兩鳥不用多尺紙長鬚慰幽獨墻頭瓠壺舍下筍  
喚作蒸鵝烹健犢前時饒客錯歡喜益水添薪費煎促  
主人此外北牕風飯後乳甌初睡足

舟中示開并寄圓

三年獨客思親淚灑作錢塘大江水却乘此水得西歸  
兩淚急收成一喜庾公樓下江月春拍手中流逢小麟  
駸駸逼人出瘦骨慄慄似我今長身夜船燈火無乃是

猶似夢中論夢事小鵬有翅未能來獨學膺門想憔悴  
一官外物等去留來未足喜去莫憂蘆鹽敢有去國恨  
菽水未免還家羞峽江之人走雲雨送船迎船聞疊鼓  
君不見並舍紫薇郎頗願生還見鄉土我今歸來四壁  
空兩牕萬軸南北風杜門忍饑吾與汝文字糶蓑析年  
豐

同韓子東賞牡丹

嗚嗚曉角春風送日日官身隨鳥動但知敲榜負佳辰

縱有芳菲難入夢起尋北郭新雨後愁見西山含雪凍  
茅茨雖暖豈宜花笑我此行真鑿空向來洛下定真譜  
只許姚花充物貢只今老病陪少年駑騎何能追駿鞚  
便將花緘問天女欲返田園尋二仲此花含笑我不言  
且插一枝風帽重

欽定四庫全書

方舟集卷三

宋 李石 撰

五言律詩

訪范師山房

野步山圍合春生物自欣  
溪聲如聽雨松色欲摩雲  
謝客推門八支郎半坐分  
林間攜小隊不敢散鴉羣

送客

送客川原路憐渠田舍秋  
沙晴分野徑林斷出溪流  
馬

瘦諸公後鷓夷一醉謀泮林無酒伴頗為老兵留

送勾龍教授

廣漢川原迴重江秋水多橋邊金作鴈湖上酒如鵝豈  
有雒書出轉添巴字訛泥塗滯行客之子惜經過

宿鍾陽僧寺

遠客來投宿高人已閉門白沙分遠水紅樹帶烟村僻  
徑逢僧覓登山見佛尊清風惜秋稼積雨掃雲屯

謝劉韶美送酒

別恨連湖海，驚心閱歲年。  
思君愁北闕，將母上西天。  
更酌鵝黃酒，如浮鴨綠川。  
不須憂九折，忠孝得雙全。

與程端卿相別峽中共繫船，  
濃東留一日。

官路隨驚鵲，家山隔斷鴻。  
荒椽秋雨過，疎竹暗泉通。  
千騎尋城北，雙舟憶濃東。  
我詩雖未好，聊為使君窮。

送程榮州被召二首

客向江南去，人言冀北空。  
賈生前席念，嚴助薦賢表。  
畫舫搖澄綠，飛車近軟紅。  
舊遊應未改，尺紙問歸鴻。

出處人情異寒暄節物殊脚輕貪遠路眼轉隔重湖近

例占郎宿

近例自郎守  
召皆除郎

頻年已守符盛時人與地尺一

費招呼

感懷

五日轉一候百年能幾春  
雨苔堆碧色風蘂委紅塵  
神晤又何說交疎莫強親  
杜門誰是伴杯酒聖賢人

眉州鹿鳴宴

大比周三歲登名蜀一涯  
聖賢元祐學父子老蘇家類

省登槐市清秋艷桂華生平晁董業親策對褒嘉

六六成鱗次叨叨賦鹿鳴三仙隨勸駕千佛要題名俎  
豆初筵秩衣冠習俗榮例須煩舉送我亦魯諸生

五更一點月照窻几以為曉也披衣視之雪厚  
至尺許喜甚賦詩

雪片成孤立蟾華與共游從教驚蜀犬曾是喘吳牛蹲  
石依松瘦寒溪映竹流遙知明歲稔攜酒上南樓

諸葛菜

郡圃耨荒雪家山斲淺沙只今諸葛菜何似邵平瓜小  
摘情何厚長齋氣自華官烹與私炙隨處即生涯

卓齊  
休記

孔明南征種菜於此名諸葛菜問黎人士皆不之識因  
閱本草即今之白芥郡圃日給此菜甚美亦一幸也

### 次韻馮涪州見寄

寄語巴中客頻頻鑷鬢霜峽雲春夢遠江月夜珍藏才  
及應多暇詞鋒恨太剛僧鄰雨花地何日再升堂

### 寄賈元鎮并問楊似賢譚德稱

客子推移地聞雞敢晏眠酒樓春夜雨柳岸早行天龍

卧風雷宅蠶叢錦繡川譚揚兩州教記我別時年

題鹿頭關石鄉祠

并序

石鄉祠白馬武安公龐將軍之祠也祠在資  
之銀山後因守黎見道中有祠土人云武安  
公為下馬炷香乃祀武侯以龐將軍配榜云  
武興非武安也過綿之白馬關關上有廟乃  
將軍為蜀守隘之地廟榜忠烈乃祥符所賜  
額碑亦可辨武安之稱無謂要之興安之誤

耳或云姚萇入蜀避家諱改名地誌鹿頭白  
馬二名同出也山高八十丈下瞰平川蜀險  
盡此亦高崇文擒劉闢之地龐將軍之墓在  
焉

古戍經秋暮危梯迸野泉鹿頭關上廟驥足縣中仙山  
疊疑無地江寬欲放天英雄今已矣自喜慣風烟

題白塔古迹二首

境物三禪勝叢林十里村寺僧晨掃地樵客夜過門瑞

像西山映乾文北斗翻

寺有三朝御書

名場薰竈突悵望塔中

尊

塔倒峰巒影

寺有古塔其影倒現于壁間

鐘埋澗谷音

掘溪得古鐘

二賢

苔像古

寺側有玉褒董均之祠

四虎竹泉深

寺有四虎井

炬火攜歸路

洗和尚初入寺山神以石炬照路

經臺喚隔林

有唐和尚譯經臺

人頭連地脉

人頭山名

古迹備幽尋

天彭行縣

公館靜寥寥園亭景物饒溪光明短竹樹影蔭危譙山

金華山人詩集 卷三  
爲忽雙下池魚時一跳主人王事簡文酒日逍遙

過永壽縣

驅馬上危坂暮鞭搖客愁峯巒驚滿目咫尺擬回頭紅

樹映野店白雲藏縣樓須知此北下地底見幽州

杜老  
有幽

州入地  
底之句

謝勝老惠胡桃

浮海黃池近還山白雪高禪如石佛樣學帶楚人騷我  
欲懷金橘師能遺木桃釣魚船上客此句可連黿

金山驛

晚泊金山驛風生玉宇秋荒苔蝕佳句喬木惜名流鼠  
穴飛泉入蛛絲積雨收何須嘆人物華屋與山丘

送澄師還昭覺

遠出蒙霜雪重來歷歲時贈師拄杖子似我簸箕兒芳  
草隨西度巖花向北垂莫忘香一瓣滄海白鷗期

夢西曹夜直

再任雖祠祿多年本為親青鱓猶夢寐綵服困風塵老

金史四庫全書  
卷三  
境人情變韶華物色新  
只堪攜茗椀禪觀對幽人

雪二首

客宦成分戍人誰笑  
牧蠻三碛橫塞外兩澗  
折雲間鳥與花爭樹  
春隨雪入山功名成索  
寞何以慰親顏

歲事頻年惡心知一飽  
難只愁無此雪得句不  
言寒酒薄何妨聖梅清  
合進官老兵憐我意赤  
脚唱平安

寒食

夜泊依漁市天寒問酒  
家燼餘缸吐粟嘶合硯  
生花月

浸江妃冷波喧海若誇漂搖隨水宿鳧雁寄生涯

閒居二首

七歲投閒日渾如未第初牛衣困襤縷鶴飯愧麤疎聖  
有杯中露朝無別後書溫尋皆舊學風雨歲時餘  
畎畝三番聘林泉一客逋君方借唇吻我自惜頭顱日  
月松偕老江湖橘可奴昭文雖未鼓洗耳即良圖

黎州鹿鳴宴

聖化如時雨吾門自教風文翁來蜀郡常袞在閩中夔

足無多用鼈頭只獨雄諸君攜手上名姓廣寒宮

九日類試院雨中制司送酒闕子二首

學省三年別文闈九日同登高遲麴蘖避濕到芎窮田  
舍飄零後江湖震蕩中忍將憂國淚滴向菊花叢

老去輕時節憂來稔歲年黃花闕上戍青草渡頭船望  
眼知誰屬歸心只自憐僅霑微祿在未敢計良田

周參政惠書唁及亡兒開二首

額馬非才具蝸牛惜弊廬歲時甘伏枕風雨阻來車藥

賦詩二首云

頗笑方舟拙聊因拙自誇家無三日穀園有四時花池  
靜魚吞墨松高鶴護砂著書逢好處快癢得仙肥  
物我相軒輊乘除只自知兒臨池上字母養鏡中絲竹  
靜泉生乳花深地產芝舊時雙燕子來往亦儀儀

山亭三首

春日山亭飯青枝古樹陰親朋知老病田舍豈初心月  
白水泉瑩花多煙霧深酒邊防惡俗醉語費披尋

人誰憐老子我自類癡兒  
愛草留荒徑疏泉入小池  
春風隨處是晴日與花宜  
好客能相貸攜鋤出短籬

小圃依山入危亭  
隱磴斜林塘掃寒雨籬  
落卧疎花處  
士七松宅先生五柳家  
柴門何所待倚杖數昏鷄

舟次湖口追憶任明府

重來又十年山水故淒然  
獨鴈仍為旅雙鳧已作仙  
濁流分蜀派青色聚淮烟  
石上罾魚者猶言縣令賢

欽定四庫全書

方舟集卷四

宋 李石 撰

七言律詩

長松奉寄鄭察院

漢使西來雪瘴深，龍蛇窟宅費披尋。  
只知筇竹通中國，何似長松種上林。  
槐省銜杯蒙舊識，楓庭躡履聽歸音。  
昔人九折回車地，笑我何由慰母心。

木蘭

大渡河邊瘴霧濃  
邛崃關下木蘭紅  
得州自昔連江雨

杜牧之得州最荒僻更值連江雨

此地仍多出竅風

沉黎多風云有風穴

一笑萱

花親念遠

解舍前後萱草甚盛

三生藜杖子心同

三藏擔母取經今廳前藜其植

杖成樹

莫緣險阻欺方寸  
忠信元來處處通

### 謝人惠新火

六龍杲杲看推移  
也有分光蔀屋時  
作古遠知燧人氏  
至今猶說介之推  
扣門自此人皆有  
暗室從來我不欺  
冷竈無煙知幾日  
憑誰乞米試晨炊

題捫參亭

林盤谷轉走縈紆兩腋乘風上太虛塵世似將玄圃隔  
仙宮元在赤城居著鞭欲跨鸞凰去舐鼎曾嫌鷄犬餘  
尺帚何當上霄漢夜捫星斗步庭除

至喜亭

歸路巴人處處逢巴人舟楫語音同雪霜寒谷殘年後  
雲雨陽臺昨夢空沙水清能延月白峽林香欲試春紅  
飯山雖瘦無奇語至喜亭中著醉翁

羽扇亭

十里山光紺碧圍，瘴煙收盡溢春暉。  
黃紬睡美聞衙唱，白羽風高入指揮。  
樓角片雲隨鴈去，谿頭驟雨送龍歸。  
君王若問安邊策，首藉漫山戰馬肥。

蠻王妻俗呼縣君，來黎州錦領烏氊，自跨馬而至。

一自昭君向北遷，花魂千載却南旋。  
歌聲不動先含笑，粉面無施任自然。  
羞整雲鬟多戴笠，欲呈錦袖漫開氊。

夜來大渡河邊過青蓋金羈穩上船

禱雪堠口廟

岷峨皎皎玉千峰只欠平川一尺融  
土霧不成雲外霰  
江沙半雜夜來風  
針頭可惜丘中麥  
堠口來祈應上公  
飽死侏儒果何意  
連年調度戰聲中

雪

羨他雪色一般同  
點綴蒼蒼滓  
太空白比蝦蟆終蝕月  
輕如蝴蝶亂隨風  
不容著跡無人處  
漫借餘光似我窮

翠竹疎梅成佛地未嫌凍立此山中

又

大地纖毫色色空寥天望極一鴻濛  
夜凝冷浸梅魂月朝拂輕回縞帶風  
身世密移塵境外乾坤收入玉壺中  
虛堂瑞草瓊林合壓盡蓬萊第一峰

同王夔州探梅

莫因紅紫媚樓臺潔白光中處處栽  
香骨未應春雪妬素心偏向暖風開  
清樽妙賞今誰健曉角年光不用催

別後西歸玉堂約詩筒只有月邊來

送牟堯文

別久無辭道路難  
敝裘依舊據征鞍  
五湖我已遭風逆  
三逕君能犯雪寒  
下榻莫嫌烹瓠葉  
倚門正及頌椒盤  
一杯少味仍相送  
折得梅花帶笑看

一笑

一笑真成亟負余  
可人懶散費招呼  
忘言摩詰元無病  
健倒盧仝不用扶  
野葛三食莫予毒  
桃花幾度約吾徒

杜門人與春偷老風雨聲中長白鬚

送虞樞密還朝

一官齒髮老侵尋金馬當年博陸沉樽俎笑談人不見  
璣衡造化我無心曾瞻玉鼎三嵎近便覺朱門百仞深  
忍使王陽行九折囚山未敢廢南音

次韻賈文學見贈

方舟不似逆風船船上燒香穩坐禪五鼓紈如隨鳥動  
一春老矣學蠶眠黃梅半熟雨不止白髮也應天見憐

賴有比隣賈詩老醉中相對聳詩肩

和楊子土牛之什

陌上花開又一春起來酒伴覓南鄰  
煙霞笑我雖成疾霜雪於君恐不仁  
柏葉殊思金馬舊柳枝偏向土牛新  
相忘已約形骸外老守先能墮醉中

禮殿

雨老苔荒墨色昏漢人兩序姓名存  
六經絲竹升堂後千古衣冠此地尊  
但使高文無廢祀只今揚馬未招魂

寥寥蜀學誰為倡東去江流注海門

送周行可

國風惆悵黍離離只有周郎五字詩得見大巫今索矣  
可憐小子孰裁之心如廢井憑誰汲語到修門未可期  
此別更須留好句梅花窗外見相思

東湖感事二首

桃李洲中別一春雪山肯為障紅塵鬼神半夜應憐我  
魑魅今朝不喜人煙雨晦明窓外眼風霜來去樹邊身

細思只合歸耕好並舍何由笑我貧

一官職檄冷秋水盡日量書接夜燈老去髭鬚無可染  
秋來面目自生憎湖通堰尾聽泉激日出山尖見雪層  
結習未除江海客不忘回首夢觚稜

黃筌畫屏

屏已失其左右二幅獨中一山水屏在耳石  
到官驗問所失月日申府蓋紹興三十年三  
月二十九日府下兵馬司捕賊不獲

阿筌千頃本曾中學道分明畫手同筆削來追麟獲後  
丹青為洗馬羣空登堂欲與修遺履穴戶何由返大弓  
尚有滄溟垂素壁且防蠅誤汚屏風

遠去親側浩然歸心再用韻

指點西來海上峰此間魑魅我能逢果何所補身先老  
豈不懷歸意已濃騏驥羣中憐短褐龍蛇窟裏倚長松  
一堂四相經行處洒掃雲烟覓舊蹤

彭門春日

不似閒人立道傍，豈將老眼眩韶光。  
溝塍綠漲春容潤，籬落紅披曉吹狂。  
薄有生涯隨處是，苦無心緒逐人忙。  
西歸官路成遷次，回指江湖似故鄉。

又送馬氏兄弟歸彭門

山程跣足肯相從，未厭崎嶇易道東。  
二馬僂風還舊觀，六鼇香餌看新功。  
北田夜誦披蓮藥，東閣春歸折桂叢。  
努力錦衣雙手壽，盃堂上雪髯翁。

食枸杞貓頭筍

一毛沼沚未宜輕甘脆提携慰客情仙狗吠林堪小摘  
乳貓蹲竹得春萌齒牙風露雖云美口腹朝昏只旋營  
尚獻一片裨玉食天庖回首隔重城

再次韻計教授

糟丘盡醉國人狂誰似東家禮義鄉萬卷短檠磨歲月  
一生寒硯敵冰霜飯牛坐待扶桑白戰馬初歸塞草黃  
奏牘三千君未晚殿幃正要上書囊

春水

倚杖河邊記水痕  
眼明喜見白鷗羣  
雨聲夜向九峰瀉  
江勢朝來三堰分  
窟宅蛟龍元自擅  
鄰家鷄犬要相聞  
我師一飽闢天意  
收拾晴風放密雲

次韻李判官見贈

鬚髯殘雪兀陳編  
煬者何由更避煙  
榮宦君方收晚歲  
論交我亦得忘年  
佐州相與營杯水  
有路從今出甕天  
一日尚能千里駕  
此間老驥不須鞭

寄知來弟

霏霏寒日隕清霜  
勃勃陰風出土囊  
尺木未階龍久蟄  
銜蘆不穩鴈斜行  
仕塗田舍成三已  
世態江湖合兩忘  
無術憂民緣底瘦  
一杯豆粥蕪心香

市進馬寒甚

邊雲寒色與愁濃  
酒味何由入頰紅  
眼看飛鳶來墮水  
心隨去騎欲追風  
親朋立望千山外  
笑語殊思一餉同  
問舍求田吾已決  
不於湖海較窮通

到沉黎舉家曠氣上如聾者踰月乃愈醫人云

此瘴氣也

僭史之孫病耳翁人佯謂我與真同蚊飛鬢外年時事  
鵲噪愁邊晚更空老去鹿皮終可隱聽如龍鼻反能聰  
昭文不鼓非無意勉為慈親奏凱風

天彭得解

一第楓宸歲月深槐花杯酒喜同斟真成冀北空羣馬  
便作雙南滿地金計上八人才子數筆端四海狀元心  
蜀天九萬看鵬運側耳潮頭駕捷音

李新仲圭同遊醮壇歸以詩告別次韻

別去名場歎滯留肯來空谷話清幽  
知君有約趨金馬笑我無心對白鷗  
千頃量陂能却老一編家學莫他求  
相將杖履題詩處跨鹿山頭記舊遊

苦胃不出二首

眇小醜醜總見欺顛狂苦訴有誰知  
五音鴛自調歌舌百藥蜂能釀蜜脾  
世態只堪春睡美鬢絲偏與落花宜  
欲因耆舊尋鄉路投劾翻然恐未遲

挽沈提刑

金馬堂堂有陸沉斯人出處可重尋  
豸冠議論回天力  
繡節平反念母心  
一代師承無別派  
百年朋舊託遺音  
便當佳傳磨蒼翠  
桐桂森然欲出林

挽何與時

留滯周南隔要津  
尚餘家傳付堅珉  
才高未覺儒冠誤  
句好仍傳樂府新  
諸子尚能頻屈指  
一門今有幾朱輪  
吾鄉水鏡君應恨  
聳壑昂霄會有人

公寓城西日恨  
未識李石也

留別何十五

修程雲水遶蒼茫  
馬上春風薜荔香  
此去雞豚思舊社  
且憑魚鴈到他鄉  
窮途偃仄風波惡  
客路消磨歲月長  
別後空堦聞夜雨  
令人還憶水曹郎

九日與一飛諸友飲菊

五年去國若為歡  
九日逢秋強自寬  
樹攬冰霜驚歲晚  
山圍霧雨試朝寒  
不關烏帽隨風落  
只把紅萸對俗看  
惟有東湖無可遣  
一杯香泛落英餐

送王應祥

進取雖狂我不狂，跨鰲今日鄭公鄉。  
未偕西蜀三年計，來訪東湖九月霜。  
桃李山城漫紅白，橘橙峽路看青黃。  
修門萬里逢嚴助，剌剖琅玕出錦囊。

次韻誼夫九日憶去歲共遊東林

菜飽無期歲已侵，高談何處著幽深。  
二年旅寄不堪說，九日盟寒那復尋。  
此地有時容醉玉，寒花無數吐秋金。  
與君豈是無詩句，聞道西山似竹林。

夷叔醉臣約九日  
泛舟是日往集西

山

展峰亭

起來蛛網罨茅簷  
脫葉飛飛却倒粘  
十月風光成嫵媚  
一林霜氣自深嚴  
幽花已老何人摘  
村酒無多喜客添  
收拾江湖閒望眼  
展峰亭上數山尖

禱雨

吾家何必自耕耘  
淮上新添戰馬羣  
聖水泱流天漢永  
顛風扇雪地爐焚  
但教東海無冤氣  
便可西郊放密雲

浪遣蛇醫與龍鬪邈然天聽若無聞

次韻喜雨

雲色垂軒潑墨深夜聞蕭瑟振枯林自憐一榻清涼意  
想見千畦饜飫心共道蘇天私此澤後來商旱更誰霖  
公歸還記田田葉坐看荷珠自勸斟

公實公衍伯仲相訪云木犀再花香橘新摘也  
併以為惠且將以佳篇因次韻

桂屏立壁杳難攀畫舫層層碧玉欄未覺香風披藥晚

向來白雪避花繁  
秋深犀子仍奔殿  
夜迴珠星得走盤  
二妙沓來成伯仲  
恨無瓊玖出毫端

石蒙恩召還以病留滯度歲賦此詩道別呈諸

同官

三馳旌聘合翻然  
萬里君恩荷記憐  
肯許老饕同守歲  
且因春酒介新年  
風傳鷓首五湖浪  
雪漲墓頤一脉泉  
他日堂中元祐脚  
只堪誦說學蘇仙

謝彭守送花

別去名園走路塵  
啼粧猶浥露痕新  
且陪東閣諸侯客  
粗了西湖一半春  
試與清泉召魂魄  
已驚黃蠟損精神  
回頭却憶風流守  
金粉珊珊墮舞茵

古柏二首

古柏原委具成都  
古今記趙次公詳其事於  
東坡詩注有妄庸人請於府恐壞屋欲去之  
石曰屋壞可修伐此柏不可復且祠廟古跡  
林木條禁甚明併舉東坡柏堂詩爭之得全

驕榮落盡雪霜浮，偃蹇空貽社櫟羞。  
濡染東家雖借潤，風烟西爽亦宜秋。  
皮災已覺神明露，心在猶懷剪伐憂。

鐵鑠何當絆龍脚，夜深雷雨捲潭秋。

石欲作鐵索絆之，以防風雨之暴。

果僅能累石，作籠固其足。

思人誰復念婆娑，窟室崖陰未易磨。  
四十圍間看溜雨，三千年後數恒河。  
不堪與世供狙杙，尚許遺民占鳥窠。  
從此便名夫子樹，匡人斤斧奈予何。

監者王朝辨進士，年八十餘矣，學官。

憫其老，不忍易之。

秋月

望崖相送欲凌虛未擬邊州作陋居  
法令牛毛紛可笑使君馬尾自能書  
白雲度嶺愁方寸黃瘴埋沙費掃除  
列戟橫琴果何擇一牕秋月竹踈踈

除夕

又是投閒歲欲除閒中因得著工夫  
園林香雪梅先透庭院清風竹自呼  
未厭夜寒燒楫柁已貪曉色進屠蘇  
巧名尚喜新年在碌碌人應笑阿奴

陪韓守劉村看牡丹

洛陽舊譜隔芳園姚魏尋香作返魂端為名花肯迂路  
定知春色落深村日中半醉如含恨雨後幽姿未忍言  
上苑分明有餘地野芹何獨遡金門

用之相訪忽憶漢孫不得一脉以死用前韻

漢孫禱羅漢而生故以僧目之畫孔明像事  
之目為卧龍公柱上作鳳山堂大字有古意  
垂盡之語云五六醫人何得無一藥可漢孫

之疾乎猶意用之一臨也

叩門剝啄涕霑襟  
忽憶僧孫病骨侵  
壁上卧龍香線斷  
柱間題鳳墨痕深  
倉皇不瞑思君眼  
輾轉猶希住世心  
真意自天渠信否  
贈篇聊當閣中箴

到夔門呈王待制

手挈東風上水關  
鳳書迎日看新班  
五湖家世烏衣巷  
三峽樓臺赤甲山  
畫戟門開春晝永  
卧龍帳穩海波閒  
安危大計須公等  
天定應知即賜環

欽定四庫全書